

**Sanaartorfissagissaaneq, pisortat kuuffeqarfiutaat pisortallu aqquserni pillugit Inatsisartut inatsisissaattut siunnersuut**

(Ineqarnermut, Attaveqarnermut Angallannermullu Naalakkersuisoq)

**Saqqummiussineq**

(Ineqarnermut, Attaveqarnermut Angallannermullu Naalakkersuisoq)

Naalakkersuisut sinnerlugit matumuuna sanaartorfissagissaaneq, pisortat kuuffeqarfiutaat pisortallu aqquserni pillugit Inatsisartut inatsisissaattut siunnersuut saqqummiuppara.

Inatsisartut inatsisissaattut siunnersuutip matuma saqqummiunneqarneratigut, pisortat kuuffeqarfiutaannut pisortallu aqquserninut oqartussaasut inissisimanagerat siullermeerluni ersarissumik nassuiarneqarpoq. Taamaalilluni suliaasaqarfimmi peqqussusiornissamut innersuussusiornissamullu inatsisitigut tunngavissanik pilersitsisoqarpoq, taamatullu – kommunini arlalinni ingerlanneqareersutut – kommunit sanaartorfissagissaaneritut akiliuteqartitsinissamut inatsisitigut tunngavissiuisoqarluni.

Taamaalilluni suliaasaqarfiup inatsisitigut maleruagassiuunneqarnissaanik kommunit kissaateqarnerat siunnersuusiornikkut naammassineqarpoq.

1. januar 1998-imili ”Sanaartorfissagissaanermi nammagassanut suliaasanullu agguaassineq nutaaq pillugu isumaqatigiissut” (sanaartorfissagissaanermut isumaqatigiissut), KANUKOKA-p aamma taamanikkut Namminersornerullutik Oqartussaasut akornanni isumaqatigiissutigineqartoq naapertorlugu, illoqarfinni nunaqarfinnilu pisortatigoortumik sanaartorfissagissaaneq kommuninit isumagineqarsimavoq.

Sanaartorfissagissaanermut il.il. Inatsisartut inatsisissaattut siunnersuummi matumani isumaqatigiissutip atuutsiinnarniarneqartup imaa tunngavilerneqarpoq.

Taamaattumik kommunit sanaartorfissagissaasarnerat innuttaasunut, suliffeqarfinnut sullissivinnullu, tamarmik immikkut sanaartorfissagissaanermik iluaquteqartussanut sammitinneqarluni kiffartuussinerusoq ingerlaannassaaq.

Kommunit taamatut kiffartuussinermi siunnersuut saqqummiunneqartoq naapertorlugu sanaartorfissagissaanermut akiliitsinissamut pisinnaatitaaffilerneqarput. Akiliutissaq kommunip sanaartorfissagissaanermut aningaasartuutaanit tamarmiusumit, Nunap Karsianit sanaartorfissagissaanermut tapiissutaasinnaasunik ilanngaaserneqartumit annertunerusunngorlugu aalajangerneqassanngitsoq siunnersuummi allassimavoq.

Kiisalu kommunit kommunimut pilersaarummi imaluunniit kommunimi malittarisassani allani sanaartorfissagissaanermut akiliutissap naatsorsorneqartarneranut tunngaviusunik atorneqartunik saqqummiussissasut siunnersuummi allassimavoq.

Siunnersuut aappasaanererneqannginnermini Inatsisartut Attaveqatigiinnermut Ineqarnermullu Ataatsimiititaliaanni suliarineqassasoq Naalakkersuisut siunnersuutigaat.

Taamatut oqaaseqarlunga sanaartorfissagissaaneq, pisortat kuuffeqarfiutaat aamma pisortat aqquserni pillugit Inatsisartut inatsisissaattut siunnersuut Inatsisartuni suliassanngorlugu tunniuppara.